

दिनांक 29.03.2025

समय: 18.45 बजे

आकाशवाणी जयपुर-अजमेर

प्रादेशिक समाचार

- राजस्थान दिवस रा सिलसिला मांय आज कोटा मांय मुख्यमंत्री रोजगार उत्सव अर युवा सम्मेलन राख्यी ज्यो-मुख्यमंत्री भजन लाल शर्मा कह्यो-नौजवान देश री बरकत री बुनियाद।
- राष्ट्रपति द्रौपदी मुर्मू कह्यो-आवती पीढ़ियां ने साफ़ वातावरण देवणो सगळां री नैतिक जिम्मेदारी।
- प्रधानमंत्री नरेन्द्र मोदी काल संवारे 11 बज्यां आकाशवाणी ऊं प्रसारित कर्या जावण वाळा खास कार्यक्रम **“मन की बात”** मांय विचार बतावेला।
- चैती नौरता काल सरू व्हेला- देवी रा न्यारा-न्यारा रूपां री पूजा करी जावेला।
- प्रदेश मांय केई ठौड़ां पारो उत्तरो।

000

राजस्थान दिवस रा सिलसिला मांय चाल रह्या कार्यक्रमां री कड़ी मांय आज कोटा मांय मुख्यमंत्री रोजगार उत्सव अर युवा सम्मेलन राख्यी ज्यो। लोकसभा अध्यक्ष ओम बिरला अर मुख्यमंत्री भजनलाल शर्मा री मौजूदगी मांय व्ह्या ई कार्यक्रम मांय 7 हजार 800 ऊं बत्ता नौजवानां ने नौकरी लागण रा कागज़ दिया ज्यो। ई सागे ई न्यारी-न्यारी सरकारी योजनावां रो फायदो लेवण वाळां ने रकम भेजी ज्यी। सरकारी स्कूलां रा विद्यार्थियां ने ई तीन सौ करोड़ रुपया ऊं बत्ती रकम भेजी ज्यी। कार्यक्रम रे दौरान मुख्यमंत्री शिक्षित राजस्थान अभियान री सरूआत करी ज्यी अर स्किल अर युवा नीति रो विमोचन करी ज्यो। ई सागे ई अटल ज्ञान केन्द्र, नशा मुक्ति केन्द्र अर गैर-सरकारी हलका मांय नौकरी-धंधा रा मौकां ऊं जुड़ी माली मदद री योजना अर द्रोणाचार्य पुरस्कार ऊं नवाज़ा जावण वाळां ने ज़मीं आवंटन रा बारा मांय ई हुकम जारी करी ज्यो। मुख्यमंत्री भजन लाल शर्मा न्यारी-न्यारी सरकारी योजनावां रो फायदो लेवण वाळां सागे वर्चुअल तरीका ऊं बातचीत ई कीनी। जळसा मांय श्री शर्मा कह्यो के नौजवान देश री बरकत री बुनियाद है। मुख्यमंत्री मोट्यारां ऊं प्रदेश ने विकसित बणावण सागे देश ने ई विकास रा गेला माथे ले जावण बाबत् कह्यो।

.....
जळसा मांय कोटा-बूंदी रा सांसद अर लोकसभा अध्यक्ष ओम बिरला कह्यो के प्रदेश री नुवी युवा नीति नुवा सपना अर नुवो नज़रियो दीनो है। वे कह्यो के ई नीति रा तैत कौशल विकास रे ज़रिये हर गांव रा नौजवानां ने माली तौर ऊं खुद रे पाण ऊबा कर्या जावेला।
.....

ज़िला मुख्यालयां माथे ई आज रोज़गार मेळा अर नौकरी देवण रा शिविर लगायी ज्यो। जयपुर मांय मुख्यमंत्री भजनलाल शर्मा अमर जवान ज्योति ऊं **रन फॉर फिट राजस्थान** ने हरी झंडी बता र रवाना कीनी। दौड़ मांय मोटी तादाद मांय नौजवान, खिलाड़ी, एनसीसी रा कैडेट अर आम जनता सिरकत कीनी। ई मौके राष्ट्रीय खेलां मांय तमगा जीतण वाळा खिलाड़ियां रो मान करी ज्यो अर अंतर्राष्ट्रीय स्तर रा नौ खिलाड़ियां ने ज़मीं रा आवंटन रा पट्टा दिया ज्यो। ई मौके मुख्यमंत्री कह्यो के सरकार खेलां ने बधावो देवण सारु बेहतरनी बुनियादी सुबीता विकसित कर रही है। वे कह्यो के प्रदेश रा गांवांई हलकां मांय ई खेलां रा विकास सारु स्टेडियम बणाया जा रह्यो है। कार्यक्रम मांय खेल मंत्री कर्नल राज्यवर्द्धन राठौड़ कह्यो के प्रदेश मांय खेलां ने बधावो देवण सारु अंतर्राष्ट्रीय ओलम्पिक पोडियम री भांत योजनावां चलायी ज्यो है। आज सगळा ज़िला मुख्यालयां माथे ई **रन फॉर फिट राजस्थान** राख्यो ज्यो। राजस्थान दिवस रा सिलसिला मांय राख्यो जा रह्यो कार्यक्रमों रा तैत आज जयपुर मांय भक्ति प्रवाह संध्या राख्यो ज्यो है। जवाहर कला केन्द्र मांय राख्यो जा रह्यो ई कार्यक्रम री थीम **भक्ति से राष्ट्र भक्ति** राख्यो ज्यो है। इण मांय पण्डित आलोक भट्ट वां रा साथी कलाकारां सागे कार्यक्रम पेश करेला। जवाहर कला केन्द्र मांय एक फोटो प्रदर्शनी ई लगायी ज्यो है। 28 मार्च ऊं चाल रही आ प्रदर्शनी 31 मार्च तांई देखी जा सके है। राजस्थान उत्सव रा तैत राख्यो जा रह्यो कार्यक्रमों री कड़ी मांय पर्यटन विभाग री ओर ऊं आज अर काल **नेचर हाईक** कार्यक्रम राख्यो ज्यो है। राजस्थान दिवस रे मौके काल राजधानी जयपुर रा अल्बर्ट हॉल माथे सांस्कृतिक कार्यक्रम राख्यो जावेला। राजस्थान दिवस रे मौके काल राज्य मांय सगळा स्मारकां अर संग्रहालयां ने सोहवणी रोशनी ऊं सजाया जावेला। ई सागे ई लोक कलाकार कार्यक्रम पेश करेला। ई मौके देसी-परदेसी सैलाणी संग्रहालयां ने मुफ्त मांय निरख सकेला। 31 मार्च ने जयपुर मांय निवेश सम्मेलन राख्यो जावेला।

000

राष्ट्रपति द्रौपदी मुर्मू कह्यो है के सगळां री भेळी कोशिशों रे मार्फत ई पर्यावरण ने बचावणो अर बधावणो संभव है। वे नई दिल्ली मांय राख्यो ज्यो राष्ट्रीय पर्यावरण सम्मेलन-2025 रा उद्घाटन जळसा मांय बोल रही ही। श्रीमती मुर्मू कह्यो के आवती पीढ़ियां ने स्वच्छ वातावरण विरासत मांय देवणो सगळां री नैतिक ज़िम्मेदारी है। राष्ट्रपति पर्यावरण ने बचावण सारु जीवण रो पर्यावरण अनुकूल अर संवेदनशील तरीको अपनावण माथे ज़ोर दीनो।

राष्ट्रीय हरित अधिकरण री ओर ऊं राख्यो ज्यो ई सम्मेलन रा न्यारा-न्यारा सत्रां मांय आब-ओ-हवा मांय बदलाव, प्रदूषण माथे काबू करण, जैव विविधता ने बचावण अर लगातार विकास समेत न्यारा-न्यारा मुद्दां माथे विचार कर्यो जा रह्यो है।

000

अजमेर मांय आज महर्षि दयानंद सरस्वती विश्वविद्यालय रो बारहवों दीक्षांत समारोह राख्यो ज्यो। इण मांय राज्यपाल हरिभाऊ बागडे अव्वल रेहवण वाळा 40 विद्यार्थियां ने सोना रा तमगा दे र अर शोध पूरा करण वाळा साठ जणां ने उपाधियां दे र नवाजा। सत्र 2023-24 मांय न्यारा-न्यारा इम्तिहान पास करण वाळा चौरानवे हजार 608 विद्यार्थियां ने उपाधियां दीरीजी। ई मौके राज्यपाल विद्यार्थियां ऊं वां री दिमाग री ताकत माथे भरोसो करण बाबत कह्यो। कार्यक्रम मांय विधानसभा अध्यक्ष वासुदेव देवनानी ई सिरकत कीनी। ई पाछे राज्यपाल दो दिन रा दौरा सारु पाली पधार्यो। वे अहलकारां सागे मीटिंग कर र वां ने ज़रूरी हुकम दीना। राज्यपाल रो देसूरी कने सोनाणा खेतलाजी मांय चाल रह्यो जळसा मांय सिरकत करण रो कार्यक्रम है।

000

प्रधानमंत्री नरेन्द्र मोदी काल आकाशवाणी ऊं प्रसारित कर्यो जावण वाळा खास कार्यक्रम **“मन की बात”** मांय विचार बतावेला। हर महीना प्रसारित कर्यो जावण वाळा ई कार्यक्रम मांय प्रधानमंत्री न्यारा-न्यारा मुद्दां माथे विचार बतावे है। ई दौरान वे खास उपलब्धियां हासिल करण वाळा लोगां अर समुदायां रो ई जिकर करे है। मन की बात कार्यक्रम री आ 120वीं कड़ी व्हेला। ओ कार्यक्रम आकाशवाणी अर दूरदर्शन रा पूरा नेटवर्क, एआईआर न्यूज वेबसाइट अर न्यूज ऑन एआईआर मोबाईल एप माथे प्रसारित कर्यो जावेला। ई सागे ई ए आई आर न्यूज, डीडी न्यूज, प्रधानमंत्री रा दफ्तर रा अर सूचना अर प्रसारण मंत्रालय रा यू-ट्यूब चैनलां माथे ई उपलब्ध व्हेला।

000

चैती नौरता काल सरु व्हेला। ई मौके घरां अर मिन्दरां मांय घट स्थापना करी जावेला। नौरता रा तैत मां दुर्गा रा न्यारा-न्यारा रूपां री पूजा करी जावेला। काल ही हिन्दी कैलेंडर रे मुजब नुवो साल ई सरु व्हेला। मुख्यमंत्री भजन लाल शर्मा जनता ने चेटीचंट री बधाई अर शुभकामनावां दीनी। ई मौके वां रा संदेश मांय मुख्यमंत्री कह्यो के भगवान झूलेलाल सामाजिक सद्भाव, त्याग, समर्पण अर अहिंसा सरीखा मानवीय मूल्यसं ऊं समाज ने उन्नति री राह बतायी। ई मौके केई आयोजन व्हेला। और ब्यौरो म्हाणी साथी माधुरी वशिष्ठ ऊं –

प्रदेश री खास-खास शक्ति पीठां अर माता रा मिन्दरां मांय चैती नौरता रा सिलसिला मांय मेळा भर रह्या है। करौली जिला मांय चाल रह्या कैला देवी मेळा मांय मोटी तादाद मांय पूग रह्या जातरूआं री हिफाजत अर सुबीता सारु प्रशासन री ओर ऊं पुख्ता इन्तजामात् करी ज्या है। बाड़मेर जिला रा सेड़वा मांय अमावस रे मौके गुरु जम्भेश्वर मेळो भर रह्यो है जिण मांय आरे-सारे रा हलकां ऊं खास तौर ऊं बिश्नोई समुदाय रा लोग मोटी तादाद मांय पूग रह्या है। माह-ए-रमजान ई पूरो व्हेवण आयो है। बाजारां मांय ईद उल फित्र ऊं जुड़ी खरीददारी सारु मोटी तादाद मांय लोग पूग रह्या है। काल चांद निजर आवण परां 31 मार्च ने ईद मणायी जावेला।

000

राज्य रा केई हलकां मांय लारला 24 घंटां मांय अधिकतम तापमान मांय 3 ऊं 7 डिग्री सेल्सियस ताई री गिरावत दर्ज करी ज्यी, जद के केई ठौड़ां रात री बगत ई पारो 2 ऊं 5 डिग्री सेल्सियस ताई उतर्यो। बीती रात कठे-कठे पारो 12 डिग्री सेल्सियस ऊं कम नापी ज्यो। आज केई ठौड़ां बादळा मंड्या रह्या। मौसम केंद्र जयपुर रे मुजब राज्य रा लंकाऊ-ऊगणी हलकां मांय 31 मार्च ऊं 3 अप्रैल ताई बादळा मंड्या रेहवण अर उदयपुर अर कोटा संभाग मांय 2 अर 3 अप्रैल ने कठे-कठे बादळां री गाज सागे हल्की बिरखा व्हेवण रा आसार है। दूजी कानी एक-दो दिन पाछे पारो चढ़बा री संभावना है। 3 अप्रैल ने राज्य रा लंकाऊ-आतूणी हलकां मांय पारो 40 डिग्री सेल्सियस अर 5 अर 6 अप्रैल ने 42 डिग्री सेल्सियस ने पार कर जावण री संभावना है।

000

राज्य मांय गम्योड़ा बच्चां री तलाश करण सारु 01 अप्रैल ऊं ऑपरेशन खुशी चलायो जावेला। राजस्थान पुलिस रो ओ अभियान 30 अप्रैल ताई चालेला। पेश है एक रपट-

000